

## *Choripe thay barvalipe*<sup>10</sup>

Sas ta sas, ekh birvakuti thagar. Dolkhe thagaras isine ekh mrush, aver chhave nanayas les. I akana o raklo baryola i reshinela veche te prandinel. Shukar, ama o raklo dehandzhas but chore, romane chhaya i dimi ov barvalo ka lel la peske, nanay sostar te daral. Lela la i ingalela la peske khere. I i day, o dad phuchena les:

– So keresa, chedo? So reshindzhan te keres?

A o chhavo lengoro vakerla:

– Dehandzhom kalke chore chhaya i mangava te lav la mange romnyake, mangava lasa te zhivinav mange.

– Emi, tuke romni, amenge – bori, mochho! Shtom mangesa la, lilyan la veche, andzhan la, shukar. Na phuchlyan nikas, ama na phuchlyan. Da ovel tuke romni, mange ka ovel bori.

Akana khidinde pes o hasumya sare te dikhen e borya, so andzhas o raklo – o tetes, o hales, o phenya, o phrala.

– Lele! – phende, – kayka li si i bori? Kayka amare chhaveske na prepela! Save romane chhaya lilas peske amaro chhavo! Kas phuchlan tu be, chhavoreya, ta prandisalilan?

A o raklo phenela:

– Tumenge kay nanay shukar, mange si but shukar. Ka zhav ko sokatsya ka sovav lasa, ama nanay te mukav la, choka te zhanen!

– Emi, shukar, – phendzhas o dad. – Shtom mangesa la, pale lela tuke romyake.

I lela la peske o raklo. Nakhela ekh masek li, duy li, i o padishahi phenela, ama ola pishim pe romnyasa ahavde pes:

– Shun mande, be mo chhavo, tu sinan but ukumushi manush! Soske na zhasa te uchines da ekh bresh, te ikales to metepi sar trebela kato zomkha vakwti, chedo, ukudindzhan. Ako prandisalilyan. Mukh te romnya pash amende. Zha chuzhbinat da, ekh bresh ikal, nay birandzhyas doktori te oves.

– Emi, me – phenela – baba, tiro lafi duy nanay te kerav. Ka zhav, ka bashladinav, ka lav davka zanayati. Shtom tu chuka mangesa, chuka neka ovel.

---

<sup>10</sup> **Koshtana Yuseinova Gogova** (Krasimira Yulyanova Metodieva). Byandili andar Blagoevgrad ando 1955 b. Athe prandili, athe zhivinela. Ki shkola geli zhi ko 7 klas, kana chorgyas la lakoro rom. Kergyas buti ko “Monopoli”, ama akana si ko sotsialna. Zhanel pes sar romni – erlika. Pakyal ko Devel.